

Sidang media diplomatik dua negara bertukar lucu

BERITA HARIAN 16 MAY 2025

m/s: 3

Jenaka 'isteri kedua' Anwar jawab pertanyaan Putin cetus gelak tawa pada sidang media di Kremlin

Sidang media diplomatik Malaysia-Russia bertukar lucu, apabila Presiden Russia, Vladimir Putin, berkongsi anekdot mengenai gurauan Perdana Menteri, Datuk Seri Anwar Ibrahim, dalam kunjungannya ke Kremlin.

Ketika menunjukkan Dewan St Andrew yang luas kepada Anwar, Putin kemudian menunjukkan tiga takhta, yang dimaksudkan untuk Tsar, Tsarina serta kerusi ketiga yang tidak dilabel.

Putin kemudian bertanyakan kepada Anwar untuk siapa takhta yang ketiga itu.

Tanpa bertangguh, Anwar terus menjawab: "Untuk isteri kedua."

Kenyataan itu mengundang gelak tawa dari dewan yang penuh dengan menteri dari Malaysia, pegawai kanan Russia serta pe-

ngamal media antarabangsa.

Putin kemudian secara berseoroh menjawab: "Itulah jawapan seorang Muslim sejati, mewakili budaya Islam".

Anwar kemudian menjelaskan sambil tersenyum: "Saya hanya ada seorang isteri, presiden. Tetapi saya rasa itu helah, cubaan menguji. Saya kata takhta kanan untuk isteri, kiri untuk isteri kedua, kemudian saya sedar ia sebenarnya untuk ibu".

Putin sambil ketawa mengesahkan: "Ya! Takhta ketiga adalah untuk ibunya. Pertukaran maklumat selalu berguna."

Detik santai

Detik santai itu menutup hari yang padat dengan perbincangan dan pembabitan rasmi peringkat tertinggi, selain gambaran ke-

mesraan di antara kedua-dua pemimpin itu.

Ia berlaku pada penghujung sidang media bersama mereka, yang mengakhiri lawatan diplomatik Anwar ke Istana Kremlin.

Terdahulu, dalam pertemuan kedua-dua pemimpin berkenaan juga, Putin meminta Anwar menyampaikan jemputan beliau kepada Yang di-Pertuan Agong Sultan Ibrahim untuk melawat Russia.

"Saya ada satu permintaan besar. Sampakan salam hormat saya kepada ketua negara (Yang di-Pertuan Agong) Sultan Ibrahim. Kami menantikan keberangkatan baginda ke Russia," kata presiden itu kepada perdana menteri, seperti yang dilaporkan oleh Agensi Berita Russia (TASS).

Daripada
**Muhammed
Ahmad Hamdan**
bhnews @bh.com.my
di Moscow

